

Was merr su babbeld

Honnes? Honnes!
Was issen?
Ess hott geschellt.
Isch habb nix geheerd.
Gieh mol onn die Dier.
Wo bisdden du?
Ich bin grad im Bad.
Isch gieh joo schunn.
Wer waren dess?
Ei die Post.
Was wollden die Post?
Die hott was gebrochd.
Was donn?
E Buch ferr misch.
Du host doch schunn oons.
Ha ha, enn ahle Witz.
Was issen dess ferr e Buch?
Iwwer de Urvoochel.
De Uhrvoochel?
Ja, de Urvoochel.
Also iwwer de Kuckuck.
De Kuckuck?
Ja, der in de Kuckucksuhr.
Ha ha, enn neie Witz.
Was issen mett dem Urvoochel?
Ei wie der entdeckt worm iss.
Den hawwese doch irschendwo ...
Ja, im Kalk vunn Solnhofe gefunne.
Der hott su enn komische Nome.
Ja, Archaeopteryx.
Wie heeßden dess uff deitsch?
Uralte Schwinge.
Was willsden iwwer den wisse?
Wie der su war, doomols.
Wie long issen dess her mett dem?
Isch muss emol noochlese.
No ja, su ungefähr?
Iwwer hunnert Millione Johr bestimmt.
Doo hotts doch die Dinos gewwe.
Ja, awwer aach schunn Veeschel.
Warn dess rischdische Veeschel?
Ja, mett Feddern unn Flitsch.
Unn von dene kumme alle Veeschel?
Ja, Mauerseeschler, Kraniche, alles.

Aach Kolibris und de Voochel Strauß?
Allminonner kummese vunn dene.
Indressond. Awwer was isch nitt kabier ...
Was kabiersde nitt?
Warum hodden de Mensch koo Feddern?
Sei fruh dasses su iss.
Ei warum donn?
Ja, weil isch als Männsche wär immer schee
bunt unn du als Weibsche häddst kaum e
Fabb in doim Fedderklaad, dess deet derr
doch sischer nitt gefalle, odder?

Eiern Honnes